

տանի մէջ, գլխաւորապէս Սպահան, Համատան, Շիրազ, Թէհրան եւ այլ քաղաքներում, եւ որոնց ծագումն աւելի մօտ գաղթականութեան արդիւնք է: Այդ Հայերը գաղթեցին Հայաստանից Պարսկաստան ժե. դարում՝ մեծն Շահաբքանի թագաւորութեան ժամանակ եւ նրա բռնակալ հրամանով, մինչդեռ Ատրպատականի կամ բուն Պարսկահայքի մէջ գտնուած Հայերը շատ հին ժամանակից ի վեր բնակուել են այդ երկրում, եւ ամբողջ դարերի ընթացքում ենթակայ են եղել շատ աղէտների եւ տառապանքի: Ատրպատականի մէջ եղած քաղաքները — Թաւրէզ, Մարանդ, Ուրմիա, Խոյ, Մարաղա, Սալմաս դեռ պատմական ամենահին ժամանակում յայտնի են եղել իբրեւ բազմամարդ հայ քաղաքներ. այսպէս գիտենք, որ Քրիստոսի երկոտասան առաքեալներից մինը Յուդա կամ Թադէոս՝ Հայաստան եկաւ եւ այդտեղ մեռնելով, թաղուեց Ուրմի քաղաքում: Ժե. դարում՝ Լէնկթիմուրի արշաւանքից յետոյ, երբ յայտնուեց բռնակալ Յուսուփ ամիրան, որ Հայաստանն արեան ծով դարձրեց, Թուլմաս Մեծօրեցի ականատես պատմագրի վկայութեան համեմատ, Ատրպատականում Հայերի մեծ բազմութիւն կոտորուեց, օրինակ՝ 1425 թուին Յուսուփի որդի Սքանտարը՝ առնելով Ուրմի քաղաքը, որի բնակիչները կէսից աւելի Հայ էին, նոյն Թուլմաս Մեծօրեցու ասելով, կոտորեց բոլոր Հայերին եւ ոչ մի հատ եւս թողեց, բաց ի մանուկներից եւ աղջիկնե-